



## Šta poslije ramazana?

Piše: **Amela Omerović-Ćeman**

*Poslanik, sallallahu 'alejhi ve selleme, je rekao: „Allahu je najdraže ono djelo koje se ustrajno čini, pa makar bilo i nezatno.“ (Buharija i Muslim)*

Uzvišeni Allah počastio nas je dočekom još jednog ramazana, mjeseca milosti i oprosta. Mnogima je ta blagodat uskraćena. Mnogi koji su postili prošli ramazan nisu dočekali ovaj među živima.

Kaže Allahov Poslanik, sallallahu 'alejhi ve selleme: „Ko isposti ramazan vjerujući i nadajući se nagradi, bit će mu oprošteni svi prethodni grijesi.“ (Buhari i Muslim)

Hoćemo li biti od njih? Da li će ramazan otići zadovoljan nama ili uplakan zbog našeg nemara? Ukoliko si iskoristio priliku i ramazan proveo u ibadetu hoćeš li dozvoliti šejtanu da te pobijedi čim bude pušten iz okova tako što ćeš se vratiti starim navikama?

Ramazan je prilika za okretanje novog lista u svom životu, za počinjanje iz početka. Prilika da usvojimo korisne navike, dušu ukrotimo i pokažemo joj da je istinska sreća i slast dunjaluka u pokornosti Stvoritelju. Ramazan je početna tačka novog poglavlja i ne dozvoli da sa njegovim posljednjim danom bude i završetak tog poglavlja. Neka se poglavlje započeto u ramazanu nastavi sve dok ti ne dođe melek smrti i susretneš svog Gospodara a on zadovoljan tobom.

Glavni cilj propisivanja posta mjeseca ramazana je postizanje bogobožnosti. Kaže Uzvišeni: „O vjernici! Propisuje vam se post kao što je propisan onima prije vas, da biste bili bogobožni.“ (Prijevod značenja El-Bekara, 183)

Zapitaj sebe da li ti se povećala bogobožnost u ovom mjesecu. Ako je odgovor potvrđan to znači da si ramazan iskoristio na pravi način.

### **Da li je naš post primljen?**

Kako znati da li je naš post primljen kod Uzvišenog?

Na primljenost posta kod našeg Gospodara ukazuje povećanje naše bogobožnosti kao i ustrajnost u činjenju dobra. Ukoliko osjetiš da si iz ramazana izašao bogobožniji i nastaviš sa pokornošću Allahu i činjenjem ibadeta, raduj se onda primljenosti svog posta.

Kaže Uzvišeni: „Najugledniji kod Allaha je onaj koji Ga se najviše boji.“ (El-Hudžurat, 13)

Poslanik, sallallahu 'alejhi ve selleme, je rekao: „Allahu je najdraže ono djelo koje se ustrajno čini, pa makar bilo i nezatno.“ (Buharija i Muslim)

## Šta poslije ramazana?

Da bi ostali ustrajni u ibadetu i poslije ramazana navest ćemo nekoliko stvari kojih bi se trebali pridržavati.

### 1. **Post šest dana ševvala**

Ebu Ejjub, radijallahu 'anhu, prenosi od Vjerovjesnika, sallallahu 'alejhi ve selleme, da je rekao: „Ko isposti ramazan zatim to poprati sa šest dana ševvala, kao da je čitavo vrijeme postio!“ (Muslim)

### 2. **Obavljanje namaza u prvom vremenu i u džematu, posebno jacija i sabah-namaza.**

„Ko klanja jacija-namaz u džematu kao da je u namazu proveo pola noći, a ko klanja sabah-namaz u džematu kao da je cijelu noć klanjao.“ (Muslim)

### 3. **Učenje Kur'ana**

Ne budi od onih koji Kur'an uče u ramazanu i onda ga ostave na police do sljedećeg ramazana. Kur'an je objavljen kao milost i uputa nama i treba da ga učimo i razmišljamo o njemu svaki dan a ne samo u ramazanu.

Dr. Umer el-Mukbil je rekao: „Ako upitate bilo kojeg muslimana: 'Vjeruješ li da je Kur'an uputa, svjetlost, milost, lijek i da oživljava srce?', bez razmišljanja će vam odgovoriti: 'Da!' Ali onda se ražalostiš kada vidiš da mnogi muslimani ne znaju za Kur'an osim u ramazanu! Ovo uistinu izgleda kao obznana da je nepotreban Allahove upute, svjetla, milosti, lijeka i živosti srca u ostalih jedanaest mjeseci!“

„Od najvrednijih dobrovoljnih ibadeta kojima se rob približava svome Gospodaru jeste učestalo učenje i slušanje Kur'ana uz razmišljanje i pokušavanje da se razumije značenje ajeta i izvuku poruke i pouke koje se nalaze u njemu. Rekao je Habab ibn Eret nekom čovjeku: 'Približi se Allahu koliko si god u mogućnosti. Znaj, nećeš Mu se približiti ničim da Mu je draže od Njegovog govora.'“ (Ibn Redžeb, *Džami'ul-'ulum ve-l-hikem*, str. 364.)

Odredi sebi vird, određeni broj ajeta koji ćeš učiti svaki dan i ustraj u tome.

### 4. **Zikr - spominjanje Allaha**

Potruđi se da ustraješ u redovnom učenju jutarnjeg i večernjeg zikra, zikra prije spavanja itd. Spominji Allaha kad god si u mogućnosti, a spominjanje Allaha ulijeva smiraj i samilost u naša srca.

### 5. **Dobro društvo**

Okruži se dobrim društvom koje će te potpomagati u činjenju dobra a odvrćati od grijeha. Izbjegavaj društvo onih koji će te nagovarati na dangubljenje i besposlicu.

Allahov Poslanik, sallallahu 'alejhi ve selleme, je rekao: „Čovjek je na vjeri svoga prijatelja, pa gledajte s kim ćete prijateljevati.“ (Muttefekun alejhi)

„Tog Dana će oni koji su jedni drugima bili prijatelji postati neprijatelji, samo to neće biti oni koji su se Allaha bojali i grijeha klonili“ (Ez-Zuhruf, 67)

### 6. **Dova**

Redovno dovi Allahu i moli Ga da te pomogne u činjenju dobra i podari ti ustrajnost. Ne škrtari u

dovi. Allah voli roba koji Ga moli i doziva.

„A kada te robovi Moji za Mene upitaju, Ja sam, sigurno, blizu: odazivam se molbi molitelja kad Me zamoli.“ (El-Bekara, 186)

Ustani na noćni namaz u zadnjoj trećini noći i dovi Uzvišenom da te pomogne.

„U zadnjoj trećini noći Allah Uzvišeni se spušta na nama najbliže nebo i kaže: „Ima li neko da me moli kako bi mu udovoljio? Ima li neko ko od Mene traži da mu dam? Ima li neko da traži oprost da Mu oprostim?“ (Buhari, Muslim)

Potruđi se da ustraješ i u ostalim dobrim djelima poput noćnog namaza, posta tri dana u mjesecu, kao i ponedjeljka i četvrtka, udjeljivanja sadake...

Daj maksimum od sebe, a Allah će tvoj trud vidjeti. I ne omalovažavaj ni jedno dobro djelo koliko god malo bilo, možda baš ono bude razlog tvog ulaska u Džennet.

I sjeti se svih onih koji nisu dočekali ovaj ramazan, možda sljedeće godine i ti budeš među njima. Ne propusti ovu priliku da se popraviš.

Ramazanski Preporod 2017 g. / 1438 h.g.

Izvor: **minber.ba**